

Centre for Disease Control (CDC)

1 den cada 68 mucha rond di mundo tin un forma di Autismo



ORANJESTAD –Segun Centre for Disease Control (CDC), 1 den cada 68 mucha rond di mundo tin un forma di Autismo. Awe riba dia mundial di Autismo ta refleha un rato riba e condicion.

Autismo ta algo cu ta afecta mucha y adulto rond mundo. Segun informacion di Minister Michelle Hooyboer-Winklaar encarga cu maneho di Enseñansa na Bon Dia Aruba, un maneho specifico

riba autismo ta esencial. Aki na Aruba tambe nos conoce e fenomeno aki y specialmente den e sector di enseñansa ta atende cun'e den forma diario. E estadistica di CDC ta varia di pais pa pais, pero hecho ta cu Autismo ta presente tur caminda y ta rekeri accion pa por enfrenta e realidad di Autismo.

Brinda sosten

Deteccion ta masha importante pa yuda maneha Autismo mas miho posibel y banda di esaki, scolnan y

educadornan ta hunga un rol grandi pa crea un ambiente cu ta sostiene, stimula y carga esunnan cu tin Austimo. Esaki ta e meta principal. Sea ta un miembro di directiva di scol, Maestro, Cablesante, IB'er, Werkster, Trahadu social di scol, Boluntario of un otro alumno cu ta saca un man pa un cu tin Autismo biba e miho bida posibel. Tur por haci un diferencia tur dia, den bida di e muchanan cu autismo.

Consciente

Mester ta consciente cu muchanan cu Autismo tin e mesun derecho cu tur otro mucha tin pa enseñansa, pues introduccion di un maneho specifico riba Autismo, hunto cu otro condicionnan di desaroyo no ta solamente importante, pero tambe esencial. □